

四庫全書

史部

欽定四庫全書

史部

唐會要卷八十二至六

詳校官編修臣溫汝適

編修臣程嘉謨覆勘

總校官降調編修臣倉聖脉

校對官中書臣王學海

賡錄監生臣孫廷玉

欽定四庫全書

唐會要卷八十二

宋 王溥 撰

考下

大中五年吏部奏准今年選格節文經考停罷者一選集准舊格兩選集今據格文一選即當年許集其京官及外官如有假故官人等請准舊格前兩選集勅旨宜依如是別勅除替及非因假故者即許一選集

六年七月考功奏近年諸州府及百司官長所書考第
察屬並不得知升黜之間莫辨當否自今以後書考後
但請勒名牒于本司本州之門三日其外縣官則當日
下縣如有升黜不當便任披陳其考第便須改正然後
申省如勘覆之後事無乖謬則論告之人亦必懲殿又
准考課令凡官人申考狀不得過兩紙三紙刺史縣令
至於賦稅異集判斷不滯戶口無逃散田畝守常額差
科均平廝宇修飭館驛如法道路開通如此之類皆是

尋常職分不合計課自今後但云所勾當常行公事並無敗闕即得唯職分乖失及開田招戶辦獄雪冤及新置之事則任錄其由申上亦須簡要不得繁多又近年以來刺史皆自錄課績申省矜銜者則張皇其事謙退者則緘默不言自今以後其巡內刺史請並委本道觀察使定其考第然後錄申本州不得自錄課績申省又州府申官人覆得冤獄書殊考者其元推官人多不懲殿或云書考日當書下考至時又不提舉請自今以後

書辨獄官人殊考日便須書原推官下考如元推官自以為屈任經廉使及臺省陳論其官人先有殿犯官長斷云至書考日與下考者如之如不舉其本判官當書下考其所申到下考省司校其所犯如與令式相符便校定申奏至勅下之後並須各牒府州又近日諸州府所申奏錄課績至兩考以後皆重具從前功課申省以冀褒升省司或檢勘不精便有僥倖請自今以後不得輒又具從前功績申上又近日諸州府所申考解皆不

指言善最或漫稱考秩或廣說門資既乖令文實為繁
弊自今以後如有此色並請准令降其考第又准考課
令在中上以上每進一等加祿一季中中者守本祿中
下以下每退一等奪祿一季准令以此勸懲事在必行
近年以來與奪幾廢或有申請之處則言無本色可支
徒挂簿書終無給與今按倉庫令諸給糧祿皆以當處
正倉充無倉之處則申省隨近有處支給又無者許以
稅物及和糴屯收等物充令式昭然不合隳廢自今以

後每省司校考畢符牒別州後仰當時便具申降與奪事由申請如違令式不舉明者其所由官請奪祿一季其已去任官遇奪祿事並請准令式處分又准考課令官人因加戶口及勸田農並緣餘功進考者于後事若不實從經恩宥其考皆從追改之事近皆不行自今以後並請准令式處分其因此得官者仍請奪又諸道所申考解從前十一月二十五日到都省開拆郎官押尾至十二月之末方得到本司開拆多時情故可見自今

以後伏請淮南曹及禮部舉選解例直送當司開拆又從前以來應得考之人並給考牒以為憑據近年考事容易給牒不一或一人考牒數處請給或數年之後方始來請自今以後校考勅下後其得殊考及上考人省司便據人數一時與修寫考牒請准吏部告身及禮部處關牒每人告出錢收贖其得殊考者出一千文上考者出五百文其錢使充寫考牒紙筆雜用以前件事條等或出于今文或附以近勅酌情揣事不至乖張謹並

修例進上伏乞宣付中書門下請更參詳苟裨至公願賜
收采仍請三年一度准與選格例修定頒下勅考功所
條流校考公事頗詳悉唯一件難便允從近日俗尚務
能人少廉恥若牒闡許其論告則自此必長紛爭當否
之間固有公議其一件宜落下餘依奏

咸通十四年考功員外郎王徽以舊例考簿上中下字
朱書吏緣為奸多有揩改請以墨書從之

冬薦

貞觀五年六月十一日勅准貞觀四年正月一日制春
秋舉薦官中書門下奏常參官八品以上外官五品以
上正員及額已得替並停薦其使下郎官御史丁憂廢
省官在外者望委諸道觀察使及州府長史其在京城
委中書門下尚書省御史臺常參清官並諸使三品已
上左庶子詹事少卿監司業少尹諭德國子博士長安
萬年縣令著作郎中允中書秘書太常丞贊善洗馬等
每年一度聞薦至六年十二月一日勅自今以後王府

官宜停薦其見任宰相及勲臣子弟亦不須舉人至八年每冬薦官比來所舉人數頗多自今以後中書門下內省御史臺五品已上如尚帶職掌授臺省官兩考者不在冬薦限如其中實有故罷免者亦須待授官周歲然後許冬薦狀中具言罷免事故其他據品秩合冬薦者則依元勅

七年五月中書門下奏諸使停罷郎官御史望令罷後其所在官經兩考已上方得冬薦如文學才行堪獎用

者不在此限其諸州上佐罷後經二年方得聞薦其非時替者許一年後聞薦

大中五年正月勅右輔闕宋球等奏冬薦狀引勅文年月不同各罰一季俸仍委吏部長以元和七年八月二十一日及太和七年七月二十六日勅著為定制

甲庫

開元十九年五月十一日勅尚書省內諸制勅庫及兵部吏部考功刑部簿書品跡並甲庫每司定員外郎主

事各一人中書門下制勅甲庫各定主書錄事已下各一人專知周年一替中間不得改移

建中元年七月八日吏部奏比來冬集中門下省吏部有官甲內庫無本今請依官甲例更寫一本進內收貯縱三庫斷裂即檢內庫本從之

二年十月十一日中書門下奏中書門下及吏部制勅甲庫等准式中書舍人給事中吏部員外郎並合專判緣官望清高兼外有職事不得躬親所以比來文歷多

有罪過令請每庫採擇一公清勤幹專押甲庫冀事得
精詳其經知四周年無負犯仍望依資與改官奉勅依
至三年四月三日給事中關播奏三省甲庫官各一人
或屬假故即中書省四品已上諸司三品已上應合舉
人冬令每人薦不得過兩人餘官不得過一人准前勅
處分至九年十一月二十九日勅每年冬薦官吏部准
式檢勘或成者宜令諸司尚書左右丞本司侍郎引于
都堂訪以理術兼商量時務狀考其理識通者及考第

事跡定為上等並舉主姓名錄奏試日仍令御史一人監試

貞元十一年正月勅本置冬薦務在得人自今以後所薦官考試奏聞上等人如無他故者准前勅類例處分其下等人有司使以時罷退任待他年重薦如情願同吏部六品以下選不得留大例請授遠慢官者任經都省陳狀吏部勘責限等第勅出後一月內送名中書

門下商量進擬

元和七年八月中書門下奏諸州府五品已上官替後委本道觀察使及長史量其才行幹能堪獎用者其人才資歷每年冬季一度聞薦其罷使郎官御史委中書門下兩省御史尚書省常參官及諸司職事三品已上文官左右庶子詹事諸司少卿監國子司業少尹國子博士長安萬年縣令太常博士著作郎秘書丞等每年冬准此聞薦從之

太和元年八月勅諸道諸軍諸使應奏判官並每年冬

薦等所奏判官除新開幕府據元額署外其向後奏請如是元闕即云闕某職今奏某人充如已有令更奏即云某職某人緣某事停奏某人替某前下臺省官合冬薦者除府使罷外既有薦用當具要籍不合便稱去職自今以後如廢闕請名更置一人其吏部行內考功司封司勲勅庫內仍請兩人分掌臨時事故即勒通知奏勅宜依至貞元八年十一月九日吏部侍郎杜黃裳奏以前資官充專知既無本官俸料頗亦難卒請入庫日

便依資與官仍許四官年不用闋奉勅前資官未有功
勞不合改轉既無俸料又慮難卒入庫日宜與同類官
貞元八年閏十二月給事中徐岱中書舍人奚陟高郢
等奏比來甲勅祇下刑部不納門下省甲庫如有失落
無處檢覆今請准制勅納一本入門下甲庫以憑檢勘
勅旨依奏

十年三月八日司封奏當司與司勲考功勅甲庫同一
專知官先無庫印今請鑄造仍以封勲考甲庫印六字

為印從之

十三年正月闕播遷給事中舊例請司甲庫皆是胥吏掌知為弊頗久播始建議並士人知之

元和八年五月吏部侍郎楊於陵奏臣伏以銓選之司國家重務根本所繫在于簿書承前諸色甲勅等緣歲月滋深文字凋缺假冒踰濫難于辨明因循廢闕為弊恐甚若據見在卷數一時修寫計其功直煩費甚多竊以大歷以前歲序稍遠選人甲歷磨勘漸稀其貞元二

十一年以後勅旨尚新未至訛謬縱須倫理請待他時
臣今商量從大歷十年至貞元三十年都三十年其間
出身及仕宦之人要檢覆者多在此限之內且據數修
寫冀得精詳今冬選曹便獲深益其大歷十年向前甲
勅請待此一件修畢續條貫補緝臣內省庸薄文忝選
司庶効涓埃以裨朝典謹具量補年月及應須差選官
吏并所給用紙筆雜項費用分析如前勅旨依奏

太和三年四月勅甲庫官舊例初入授同類官考滿去

職則與依資改轉此事參差有擾有屈今宜並同諸色職事帶正員官者准寶歷二年十一月九日勅處分其改轉亦同前件如已在甲庫授官者即宜且依舊勅處分

五年六月勅應選人及冬集人文案門下省檢勘異後比來吏差南曹令史收領却納門下甲庫在於公事頗甚勞擾自今以後謹勅吏部過選院本令史便自分付甲庫以備他年檢勘仍請門下省勒甲庫令史每過選

時常切檢點收拾明立文案據官吏等遞相分付不得妄有破除南曹申詣之時如有妄稱失落欠少本令史及專知官請准檢報揩抹違越條例處分

九年十二月勅中書門下吏部各有甲庫厯名為三庫以防踰濫如聞近日諸處奏官不經所司檢尋未免奸偽起今以後諸司諸使諸道應奏六品以下諸色人稱舊有官及出身請改轉並請授官可與商量者除進士登科衆所聞知外宜令先下吏部中書門下三庫委給

事中中書舍人吏部格式郎中各與本庫官同檢勘具
有無申報中書門下審無異同者然後依資進擬如諸
司諸使諸道奏論不實以為無有臨時各重加懲罰

當直

故事尚書省官每一日一人宿直都司執直簿轉以為
次諸長官應通判者及上佐縣令不直凡内外官日出視事午而退有事
則直官省之務繁者不在此限

故事左右丞及尚書秘書監九寺卿少府監將作匠御

史大夫國子祭酒太子詹事國子司業少監御史中丞
大理正外官貳佐已上及縣令准開元式並不宿直

貞觀五年十二月二十日勅文武官兼雜職免宿直

大將軍李大亮領太子右率衛工部尚書身居三職宿衛兩宮至宿直太宗勞之曰至宮宿直我便安卧

左衛

天冊萬歲元年三月令宰相每日一人宿直其後與中書
門下官通直至開元二年姚崇為紫微令紫微官直次
下讓宰相崇以年位已高時亦違直其次省官多不從
所由吏數持直簿詣之崇題其簿曰告直令吏遣去又

來必欲取人有同司命老人年事給終不擬當諸官皆
歡笑不復逼以直也至十一年停宰相當直

景龍三年九月蘇瓌拜右僕射同中書門下三品與男
中書舍人頤聯事奏請出為外官遂進秘書監御筆批
云僕射不綰中書蘇頤不必改也明日因讓上曰欲得卿
長在中書遂與父聯事通直

開元二十年九月二十一日是中書舍人梁昇卿私忌
二十日晚欲還即令傳制報給事中元彥冲令宿衛會

彥冲已出昇卿至宅令狀報彥冲以旬假與親朋聚宴
醉中詰曰汝何不直昇卿又作書報云明晨是先忌比
往復日已暮矣其夜有中使賚黃勅至直官不見回奏
上大怒出彥冲為邠州刺史因新昌公主進狀申理公
主即彥冲甥張垍之妻云元不承報此是中書省之失
由是出昇卿為莫州刺史

貞元元年正月給事中袁高既宿直時盧杞由新州司
馬移吉州長史是月上命為饒州刺史高既宿直當草

杞制遂執以謁宰相盧翰劉從一曰盧杞作相三年矯誣陰賊退弃忠良朋附者啖唾登青雲睚眦者顧盼擠溝壑致使鑾輿播越天下瘡痍皆杞之為也幸免族誅已為漏網若更授大郡恐失天下之望惟相公執奏之事尚可救翰從一皆杞所引用不從高之言遂命舍人草制及詔出高又執之不下仍上奏盧杞為政極惡窮凶六軍將校願食其肉百辟卿士嫉之若讐疏未納明日諫官陳京趙需裴佶宇文炫盧景亮張薦等上疏上

良父謂曰若與盧杞刺史太優與上佐可皆曰可遂追
杞饒州制翌日上遣中使宣慰高云朕徐思卿言深覺
愜當依卿所奏

會昌四年三月御史臺奏今月三日左右金吾仗當直
將軍高漢貞季邱並不到准會昌三年二月四日勅比
來當日多歸私第近晚方至本仗宿直事頗容易須有
提撕今日以後晝日並不得離本仗縱有公事期集當
直人亦不得去仍令御史臺差朝堂驅使官覺察如有

違者錄名聞奏勅旨宜各罰一月俸

休假

貞觀元年十月少府監奏丞閣立行妹喪准令假給二十日立行專知羽儀工作未了請止給三日上曰同氣之情義不可奪自喪亂以來風俗弛壞特敦獎命依次令給假差人代之

永徽三年二月十一日上以天下無虞百司務簡每至旬假許不視事以便百僚休沐

四年五月二十一日勅高祖太武皇帝既開洪業不可
限以常禮忌日特宜廢務

天授元年四月勅遊客官人子弟勒還本貫十日外杖
一百居停同罪須覲問即陳牒給假發遣

開元二十二年六月十七日勅諸州千秋節多有聚斂
頗成糜費自今以後宜聽五日一會盡其歡宴餘兩日
休假而已任用當處公廨不得別有科率至寶應元年
八月三日勅八月五日本是千秋節後改為天長節舊

給假三日其前後一日假權停至九月一日勅天平地成節准乾元元年九月一日勅休假三日望准八月三日勅前後日權停

二十四年二月十一日勅寒食清明四月四日為假至大歷十二年二月十五日勅自今以後寒食通清明休假五日至貞元六年三月九日勅寒食清明宜准元日節前後各給三日

二十五年正月七日勅許自後百官每旬節假不須入

曹司至天寶五年五月九日勅頃自宴賞已放入朝節
假常參未聞申命公私協慶千年一時自今已後每至
旬假休假日書門下及百官並不須入朝亦不須衙集
其年正月內外官五月給遊假九月給授衣假分為兩
番各十五日其遊假若風土異宜各種不等隨便給
之

天寶四載六月十四日勅頃以鄉閭侍丁優給孝假官
吏等仍科雜役天寶初已遣優矜如今聞比來乃差征

鎮豈有務其輕而不恤其重放其役而更苦其身永言及此良用慚然自今後侍丁孝假不須差行

五年二月十三日中書奏大聖祖以二月十五日降生請同四月八日佛生之時休假一日

大歷三年七月十三日勅七月十五日前後各一日宜准舊例休假

貞元五年四月十五日勅四月十九日降誕之辰宜休

假一日

二十一年五月御史臺奏伏准承前舊例諸司三品以上長官請假滿日正衙參見其餘品秩卑自有本司官長不曾于正衙參假去年六月侍御史竇羣奏令尚書省四品中書門下御史臺五品同三品例正衙參假訖既失舊章又煩聖聽今請准例三品以上假滿日正衙見如有違越請准乾元元年三月勅每犯奪一月俸依奏

元和二年八月御史臺奏新授常參官在城未上及在

外未到假故等准令式職事官假滿百日即合停解其
未上官等並無正文或滿百日無憑舉奏自今以後如
有在城授官疾病未上者在外授官勅到後計水陸程
外滿百日者並請停解從之

四年四月貶沈達為泉州參軍徐肇為建州參軍二人
為率府掾各請演州愛州婚姻假御史臺奏州皆萬里
之外量其秩滿猶有假程請量點以懲慢易

七年十一月勅自今後遇輶朝日中書門下宜同假日

不須入

長慶二年四月御史臺奏檢校司空兼太子少傅嚴綬
疾病假滿百日合停勅嚴綬年位俱高須加優異宜依
舊秩未要舉停又其年六月右金吾衛大將軍郭鏕疾
假滿百日上以忠勇許未停官

太和八年九月御史臺奏三班常參官舊例每月得請
兩日事故假今許請三日仍不得在盡入衆集並臨朝
等日一品二品官如合朝不朝及盡入衆集不到臨朝

時請假等並請假舊例每季終仍具請事故假日錄狀聞奏兼申中書門下文武常參官每月終比較其中請事故假多人三品六品各罰兩人四品五品人數稍多各罰三人請各罰一月俸如合罰人數稍多即從下罰亦不過罰兩人及三人如實疾患已連請假十日以上為衆所知不在此限每至次月具狀申中書門下文武常參應請某年喪假者除准式假滿連許請三日事故假仍五箇月內每朔望日各許請事故假一日其大功

喪假者准式假滿連許請事故假兩日仍三箇月內朔望日各許請事故假一日勅旨依奏

會昌元年二月勅二月十五日玄元皇帝降誕之日宜為降聖節休假一日

二年十二月御史臺奏應諸司六品以下官請外州婚禮周親以上侍省等假節目應當司牒諸司諸州府及節度使觀察使度支鹽鐵監院等節目伏以前後勅文非嚴致茲輕犯蓋未必行臣等今稍重科條庶令知

懼勅肯依奏

大中四年正月制設官分局各有主張具于在公責辦
斯切諸州府及縣官到任已後多請遠假或言周親疾
病或言將任婚姻令式假名長吏輒為隱蒙遂使本曹
公事併委比廳手力俸錢盡為已有勤勞責罰則在他
人須有條流俾其兼濟其諸州府縣官請出界假故一
月以下即任權差諸廳通判一月以上即勾當留官例
其課料等據數每貫尅二百與見判案官

咸通十四年正月御史丞韋蟾奏應諸州刺史除授正衙辭謝後託故陳牒請假實為容易自今後如實有故為衆知者三日外不在陳牒之限應內外蔭官入京合更朝謝如遇假日且合在都亭驛近日多請假便歸私家既犯條章頗乖禮敬自今以後望准故事如未朝謝須于都亭驛俟日如違越臺司糺勘從之

醫術

武德中閩中多骨蒸病得之必死遞相染著許肩宗每

療皆愈或曰公醫若神何不著書以貽將來隋宗答曰
醫乃意也在人思慮有脉候幽微若其難別意之所解
口莫能宣古之名手唯是別脈既精然後識疾人之於
藥有正相當者唯須單用一味直攻彼病即可愈今人
不能別脉莫識病源以情臆度多寡藥味譬之於獵不
知兔處多發人馬空地遍圍或冀一人偶然逢也如此
療病不亦疎乎脉之深遠既不可言故不能著述

甄權貞觀中年百餘歲太宗幸其第賜以几杖撰經針

方明堂人形圖其弟立亦達醫術撰本草音義七卷古
今錄驗方五十卷

貞觀三年九月十六日諸州治醫學至開元十一年七月五日詔曰遠路僻州醫學全無下人疾苦將何恃賴宜令天下諸州各置職事醫學博士一員階品同於錄事每州本草百一集驗方與經史同貯至二十七年二月七日勅十萬戶以上州置醫生二十人十萬戶以下置十二人各于當界巡療

二十二年九月十六日右衛率府長史王玄策奉使天竺得方士那羅邇婆寐自言壽二百歲云有長生之術上頗信之深加禮敬館之金鰐門內造延年之藥竟不致還死于長安

顯慶二年右監門長史孫敬上言陶弘景所撰本草事多乖謬請加刪補詔令中書令許敬宗大常寺丞呂才太史令李淳風禮部郎中孔志約尚藥奉御許季崇並諸名醫等二十人增損舊本徵天下郡縣所出藥物並

書圖之仍令司空李勣總監定之並圖五十卷成上之
至四年正月十七日撰成及奏上問曰本草行來自久
今之改修何所異也于志寧對曰舊本草是陶宏景合
神農本經及名醫別錄而注解之宏景僻在江南不能
遍識藥物多有紕謬其所談及錄功不盡四百有餘種
今皆考而正之本草之外新藥功用有效者復百餘種
今附載之此所以為勝也上稱善詔藏于秘府

三年詔徵太白山人孫思邈至居于鄱陽公主廢府時

年九十餘視聽不衰

盧照隣宋令文孟
說皆執師費之禮

照隣嘗問曰名

醫愈疾其道何也思邈曰吾聞善言天者必資之於人

善言人者亦本之於天天有四時五行日月相推寒暑

迭代其轉運也和而為雨怒而為風散而為露亂而為

霧凝而為霜雪張而為虹蜺此天地之常數也人有四

肢五臟一覺一寐呼吸吐納精氣往來流而為榮衛彰

而為氣色發而為音聲此人之常數也陽用其聲陰用

其形天人之所同也及其失也蒸則生熱否則生寒結

而為瘤贅陷而為癰疽奔而為喘乏渴而為焦枯神發
乎面變動乎形推及天地則亦如之故五緯盈縮星辰
錯行日月薄蝕彗孛流飛此天地之危變也寒暑不時
此天地之蒸否也石立土踊此天地之瘤贅也山崩地
陷天地之癰疽也衝風暴雨天地之奔走也雨澤不降
川瀆涸竭天地之焦枯也良醫導之以針石救之以藥
劑如聖人和之以良德輔之以人事故身有可愈之疾
天地有可消之災通乎數也照隣曰人事何如思邈曰

膽欲大而心欲小智欲圓而行欲方照隣曰何謂也思
邈曰心為五臟之君君以恭慎為主故心欲小膽為臟
之將將以果決為務故膽欲大智者動象天故欲圓仁
者靜象地故欲方詩曰如臨深淵如履薄冰謂小心也
糾糾武夫公侯干城謂大膽也傳曰不為利回不為義
疚仁之方也易曰見幾而作不俟終日智之圓也照隣
又問曰養性之要何也思邈曰天道有盈缺人事多屯
厄苟不自慎而能濟于屯厄者未之有也故養性之士

先知自慎自慎者以憂畏為本經曰人不憂畏大威至
矣憂畏者生死之門存亡之由禍福之本吉凶之元也
故士無憂畏則仁義不立農無憂畏則稼穡不滋工無
憂畏則規矩不設商無憂畏則貨殖不盈子無憂畏則
孝敬不篤父無憂畏則慈愛不著臣無憂畏則勲庸不
成君無憂畏則社稷不安故養性者失其憂畏則心亂
而不理形躁而不寧神散而氣越志蕩而意虛應生者
死應存者亡應成者敗應吉者凶夫憂畏者其猶水火

不可暫忘也人無憂畏子弟為勍敵妻妾為寇仇是故
太上畏道其次畏天其次畏物其次畏人其次畏身憂
於身者不拘于人畏于心者不懼于人畏于己者不制
于彼慎于小者不懼于大戒于近者不悔于遠能如此
者水行蛟龍不能害陸行虎兕不能傷五兵不能及疫
癘不能染讒賊不能謗毒蠍不能加善知此者則人事
畢矣照隣自傷強仕之年而嬰沉疾乃作病梨樹賦以傷
稟受之不同也至四年恩邈授承務郎直上藥局

開元十一年九月七日親製廣濟方頒示天下

天寶五年八月勅朕所撰廣濟方宜令郡縣長官選其
切要者錄于大版上就村坊要路榜示仍委採訪使勾
當無令脫錯

乾元元年二月五日制自今以後醫行入仕者同明經
例處分至三年正月十日右金吾長史王淑奏醫術請
同明法選人自今以後各試醫經方術策十道本草二
道脉經二道素問十道張仲景傷寒論二道諸雜經方
義二道七通已上留以下放又尚食藥藏局請同典膳

局太醫院請同太樂署

貞元二年九月山人鄧思齊獻威靈仙草出商州能愈衆疾上於禁中試用有效令編附本草授思齊太醫丞八年八月加殿中省侍御醫藥藏局丞俸錢仍令侍御醫及尚藥直長藥藏郎並留授翰林醫官所司不得注擬

十二年二月十三日上親製貞元廣利方五卷頒於州府至三月十五日勅貞觀初諸州各置醫博士開元中

兼置助教簡試醫術之士申明巡療之法比來有司補擬雖存職員藝非專精少堪施用緬思牧守實為分憂委之採擇當悉朕意自今以後諸州應闢醫博士宜令長史各自訪求選試取藝業優長堪効用者具以名聞已出身入試吏部更不須選集

十二年八月勅其見任醫術官應非翰林供奉不在加料錢限

十七年十二月勅翰林醫官及藥童自今以後縱考滿

卷之十二
并不得于所司選其見選人亦宜停

二十一年正月罷翰林陰陽士醫相射覆碁諸待詔三十二人初王叔文以碁進既用事惡其與己儕類相亂故罷之

長慶元年正月處士張臯上疏曰臣聞神慮淡則血氣和嗜欲勝則疾病作和則必臻于壽考作則必致于傷殘是以古之賢聖務自頤養不以外物撓耳目不循聲色改性情由是和平自臻福慶斯集故易曰无妄之疾

勿藥有喜詩曰自天降康降福穰穰此皆理合天人著
在經術然則藥以攻疾無疾固不可餌之高宗時有處士
孫思邈者精識高遠保達攝生其所著千金方三十卷
行之於代序論云此人無故不宜服藥偏有所助令人
藏氣不平思邈此言可謂洞於事理也或寒暑為寇節
宣有乖事資醫方尚須重慎故禮云醫非三代不服其
藥施於凡庶猶且如此况在天子豈得自輕先朝暮年
頗好方士徵集非一嘗試已多累致危疾聞於中外足

為殷鑒陛下素所詳知必不可更踵前車自貽後悔今朝野之人紛紜竊議直畏忤旨莫敢獻言臣蓬艾微生麋鹿同處既非邀寵亦又何求但以曾覽古今粗知忠義有聞而默於理不安願陛下無忽芻蕘庶裨萬一時穆宗頗好金石之藥疏奏上喜歡久之竟訪臯不獲

唐會要卷八十二

欽定四庫全書

唐會要卷八十三

宋 王溥 撰

嫁娶

貞觀元年二月四日詔曰昔周公治定制禮垂裕後昆
命媒氏之職以會男女每以仲春之月順時行令蕃育
之理既弘邦家之化攸在朕恭承天命為之父母永言
亭育用切于懷若不申之以婚姻明之以顧復便恐中

饋之禮斯廢絕嗣之弊尤深既生怨曠之情或致淫奔之辱憲章典故實所庶幾宜令有司所在勸勉其庶人男女無室家者並仰州縣官人以禮聘娶皆任其同類相求不得抑取男年二十女年十五之上及妻喪達制之後孀居服紀已除並皆申以婚媾令其好合若貧窶之徒將迎匱乏仰于親近縣里富有之家裒多益寡使得資送其鰥夫年六十寡婦年三十以上及婦雖尚少而有男女及守志貞潔並任其情無勞抑以嫁娶刺史

縣令以下官人若能婚姻及時鰥寡數少量准戶口增多以進考第如導勸乖方失於配偶准戶減少附殿

六年御史大夫韋挺上表曰夫婦之道王化所先婚姻之禮人倫攸尚所以承紹家業嗣續祖妣靜而思之安可不敬嫁女之室有不息火之悲娶婦之家有不舉樂之感今貴族豪家婚姻之始或奏管絃以極歡晏唯競奢侈不顧禮經非所謂嗣親之道念別離之意正始之本實在於茲茲若不訓以義方將恐此風愈扇

十六年六月詔氏族之盛實繁于冠冕婚姻之道莫先
於仁義自有魏失御齊氏云亡市朝既遷風俗凌替燕
趙右姓多失衣冠之緒齊韓舊俗或乖德義之風名不
著于州閭身未免於貧賤自號膏粱之胄不敦匹敵之
儀問名惟在於竊貲結褵必歸于富室乃有新官之輩
豐財之家慕其祖宗競結婚媾多納貨賄有如販鬻或
自貶家門受屈辱于姻姪或矜其舊族行無禮於舅姑
積習成俗迄今未已既紊人倫實虧名教朕夙夜兢惕

憂勤政道往代蠹害咸已懲革惟此敝風未能盡改自
今已後明加告示使識嫁娶之序各合典禮知朕意焉
其自今年六月禁賣婚

永徽二年九月紀王慎等議堂姨母之姑姨及堂姑姨
父母之姑姨父母之姑舅姊妹婿姊妹堂外甥雖並外
姻無服請不為婚詔可之先是御史大夫李乾祐奏言
鄭州人鄭宣道先聘李玄乂之妹為妻玄乂妹
即宣道堂姨玄乂情不合請罷婚宣道經省陳訴省以

法無禁判許成親于是紀王慎等因此有議云

顯慶三年七月制王女出嫁者稱適不得稱降取王女者稱娶不得稱尚 四年十月十五日詔後魏隴西李寶太原王瓊榮陽鄭溫范陽盧子選盧渾盧輔清河崔宗伯元孫凡七姓十一家不得自為婚姻仍自今已後天下嫁女受財三品以上之家不得過絹三百匹四品五品不得過二百匹六品七品不得過一百匹八品以下不得過五十匹旨充所嫁女貲粧等用其夫家不得受

陪門之財李義府奏也

太極元年左司郎中唐紹上表曰士庶親迎之禮備諸六禮所以承宗廟事舅姑當須昏以為期詰朝謁見往者下俚庸鄙時有鄣車邀其酒食以為戲樂近日此風轉盛上及王公乃廣奏音樂多集徒侶遍擁道路留滯淹時邀致財物動踰萬計遂使鄣車禮貺過于聘財歌舞喧譁殊非助感既虧名教又蠹風猷違素禮經湏知節制望請勅令禁斷至十一月十二日勅王公已下嫁

娶比來時有鄣車既虧風教特宜禁斷

開元十九年四月四日于京城置一禮會院 其年九

月二十四日勅禮會院宜屬司農寺其什物合令所司

供院在崇仁坊南街

二十二年二月勅男年十五女年十三

以上聽婚嫁諸州縣官人在任之日不得共部下百姓

交婚違者雖會赦仍離之其州上佐以及縣令于所統

屬官亦同其定婚在前居官在後及三輔內官門閥相

當情願者不在禁限

建中元年十一月十六日勅宜令禮儀使與博士及宗正卿李琬漢中王瑀光祿卿李涵約古今舊儀及開元禮詳定公主郡主縣主出降覲見之儀條件聞奏將以化行天下用正國風至十二月二日禮儀使顏真卿等奏郡縣主見舅姑請于禮會院過事明日早舅坐于堂東階上西向姑南向婦執笄竹器也
表練裏盛以棗栗升自西階東面再拜跪奠于舅席前舅舉之贊者徹以東婦退再拜降于姑階下受笄盛以暇修從者執
于階下升進北面再拜

跪奠于姑席前姑舉之贊者受以東婦退又再拜降詣
東西階拜婿之伯叔兄弟姊妹訖便赴光順門謝恩婿
之親族次第奉謝訖舊赴十六王宅觀花燭伏以婚禮主
敬竊恐非宜並請停障車下婿却扇詩等庶行禮之夕
可以感恩至于聲樂尤恐非禮亦請禁斷相見行禮近
代設以氈帳埽地而置比乃戎禮穹廬之制合于堂室
中置帳請准禮施行今時俗以子卯午酉年謂之當梁
年其年娶婦舅姑不相見蓋理無所據亦請禁斷

其年十一月勅婚禮皆用誕馬在禮經無其文案周禮
玉人有璋諸侯以聘女禮云玉以比德今請駙馬加以
璋郡主婿加以璧以代用馬又其函書出自近代事無
經據請皆勿用從之勅會昌元年十一月勅婚娶家音
樂并公私局會花蠟並宜禁斷

租稅上

舊制凡賦役之制有四一曰租二曰調三曰役四曰雜

徭開元二十三年勅以為令天下无事百姓徭役務
從減省遂減諸司色役一千二萬二百九十四人

武德二年二月十四日制每丁租二石絹二丈綿三兩
自茲以外不得橫有調歛七年三月二十九日始定
均田賦稅凡天下丁男給田一頃篤疾廢疾給四十畝
寡妻妾三十畝若為戶者加二十畝所授之田十分之
二分為世業餘以為口分世業之田身死則承戶者授
之口分則收入官更以給人每丁歲入粟二石調則隨
鄉土所差綾絹紩各二丈布加五分之一輸綾絹紩者
兼調綿三兩輸布者麻三斤凡丁歲役二旬若不役收

其傭每日三尺有事而加役者旬有五日免其調三旬
則租調俱免通正役不過五十日若夷獠之戶皆從
半稅凡水旱蟲霜為災十分損四已上免租損六已上
免調損七已上課役俱免貞觀十一年侍御史馬周上
疏曰自古明王聖主雖因人設教寬猛隨時而大要惟以
節儉于身二者是務今百姓承喪亂之後比于隋時纔
十分之一而供官徭役道路相繼兄去弟還首尾不絕
春秋冬夏略無休時陛下雖每有恩詔令其減省而有

司作既不廢自然湏人徒行文書役之如故臣每訪聞
四五年來百姓頗有嗟怨之言以為陛下不存養之今
京師及益州諸處營造供奉器物并諸王之服飾議者
皆以為儉陛下少處人間知百姓辛苦前代成敗自
所親見尚猶如此而皇太子生長深宮不更外事萬歲
之後固聖心所當憂也凡修政教當修之於可修之時
若事變一起而後悔之則無益也故人主每見前代之
亡則知其政之所由喪而皆不知其身之失是知殷紂

笑夏桀之亡而幽厲亦笑殷紂之滅京房云後之視今亦猶今
之視古此言不可不誠也往者貞觀之初率土霜儉一匹綃纔
得一斗米而天下帖然百姓知陛下甚愛憐之故人人自安曾
無謗讟自五六年來頗歲豐稔一匹綃得粟十餘石百姓皆以
為陛下不憂憐之咸有怨言又今所營為者頗多不急之務故
也自古已來國之興亡不由蓄積多少唯在百姓苦樂且以近
事驗之隋家貯洛口倉而李密因之東都積布帛而王世充據
之西京府庫亦為國家之用至今未盡向使洛口東都無粟帛

則王世充李密未能聚大衆但積貯者固是有司之常事要當人有餘力而後收之若人勞而強歛之更以資寇積之無益也然儉以息人貞觀之初陛下已躬為之故今行之不難也若人既勞矣而用之不息倘國中被水旱之災邊方有風塵之警狃狡因之以竊發則有不可測之事矣以陛下之明誠欲勸精為政不煩遠求上古之術但及貞觀之初則天下幸甚

永淳元年太常博士裴守真上表曰夫穀帛者非造化不育非人力不成一夫之耕繩兼數口一婦之織不贍

一家賦調所資軍國之急煩徭細役並出其中黠吏因
公以貪求豪強恃私而逼掠以此取濟人無以堪又以
征戍濶遠土木興作丁伍疲于往來餉饋勞于轉運徵
有水旱道路遑遑豈不以課稅殷繁素無儲積故也夫
太府積天下之財而國用有缺少府聚天下之仗而造
作不息司農理天下之粟而倉廩不充太僕掌天下之
馬而中廄不足比數司者役人有萬數費損無限極調
廣人竭用多獻少奸偽由此而生黎庶緣斯而苦此有國

之大患也

開元八年三月二十日勅頃者以庸調無憑好惡湏准故造作樣以領諸州令其好不得過精惡不得至濫任土作貢防源斯在而諸州送物作巧生端苟欲副于斤兩遂則加其丈尺至有五丈為匹者理甚不然闊一尺八寸長四丈同丈共軌其事久行立樣之時亦載此數若求兩而加尺甚暮四而朝三宜令所司簡閱有踰于此比常例丈尺過多聞奏

十六年七月勅諸州租及地稅等宜令州縣長吏專勾
當依限徵納訖具所納數及徵官名品申省如徵納違
限及檢覆不實所由官並先與替仍准法申懲二十二
年五月十三日勅定戶之時百姓非商戶郭外居宅及
每丁一牛不得將入貨財數其雜匠及幕士并諸色同
類有番役令免征行者一戶之內四丁已上任此色役
不得過兩人三丁已上不得過一人其年七月十八
日勅自今已後京兆府關內諸州應徵庸調及資課并

限十月三十日畢至天寶三載十一月赦文每載庸調起八月徵以農功未畢恐難卒辦自今已後延至九月三十日

二十五年三月三日勅關輔庸調所稅非少既寡蠶桑皆資菽粟常賤糴貴買損費逾深又江淮苦變造之勞河路增轉輸之弊每計其運腳數倍加錢今歲屬平和庶物穰賤南畝有十斗之獲京師同水火之饑均其餘以減遠費順其便使農無傷自今已後關內諸州庸調

資課並宜准時價變粟取米送至京逐要支用其路遠處不可運送者宜所在收貯便充隨近軍糧其河南河北有不通水利宜折租造絹以代關中調課所司仍明為條件稱朕意焉

二十九年二月十二日勅自今已後應緣納物或有濫惡者更不徵折估但明為殿最責在所由者可准二十七年二月十七日敕文條例處分

天寶元年正月一日赦文如聞百姓之內有戶高丁多

者為規避父母現在乃別籍異居宜令州縣勘會其家
之中有十丁已上者放兩丁征行賦役五丁已上者放
一丁即令同籍共居以敦風教其侍丁孝假與免差科
九年十二月勅自今已後天下兩稅其諸色輸納官典
受一錢已上並同枉法貪論官人先解見任典正等先
決四十委採訪使巡察若不能舉按者採訪使別有處
分

廣德二年七月十一日制一戶之中有三丁放一丁庸

稅地稅依舊

大歷四年正月十八日勅百姓及王公已下自今已後
宜准度支長行旨條每年稅錢上上戶四千文上中戶
三千五百文上下戶三千文中上戶二千五百文中中
戶二千中下戶一千五百下上戶一千下中戶七百文
下下戶五百文其現任官一品准上上戶稅九品准下
戶稅餘品並准依此戶等稅若一戶數處任官亦每
處依品納稅其内外官仍據正員及占額內闕者稅其

賦及同正員文武官不在稅限其百姓有邸店行鋪
及爐冶應准式合加本戶二等稅者依此稅數勘
責徵納其寄莊戶准舊例從八等戶稅寄卜住戶
從九等戶稅比類百姓事恐不均宜各遞加一等
稅其諸色浮客及權時寄住戶等無問有官無官亦
所在為兩等收稅稍殷有者准八等戶稅餘准九等戶
稅如數處有庄田及每處納稅諸道將士庄田既緣防
禦勤勞不可同百姓例並一切從九等輸稅

八年正月二十五日勅青苗地額錢天下每畝率十五文以京師煩劇先加至三十文自今已後宜准諸州每畝十五文

十四年五月內庄宅使奏州府沒人之田有租萬四千餘斛官中主之為冗費上令公給行在以為軍儲

建中元年正月五日赦文宜委黜陟使與觀察使及刺史轉運所由計百姓及客等約丁產定等第均率作年支兩稅如當處土風不便更立一限其比來徵科色目

一切停罷至二月十一日起准條請令黜陟觀察使及
州縣長官據舊徵稅數及人戶土客定等第錢數多少
為夏秋兩稅其鰥寡惄獨不支濟者准制放免其丁租
庸調並入兩稅州縣常存丁額准式申報其應科解斗
准據大歷十四年見佃青苗地額均稅夏稅六月內納
畢秋稅十一月內納畢其黜陟使每道定稅訖具當州
應稅都數及徵納期限并支留合送等錢物斛斗分析
開奏并報度支金部倉部比其月水赦天下遣黜陟使

觀風俗仍與觀察使刺史計人產等級為兩稅法此外
歛者以枉法論

八月宰相楊炎上疏奏曰國家初定令式有租賦庸調
之法至開元中玄宗修道德以寬仁為理本故不為版
籍之書人戶寢溢隄防不禁丁口轉死非舊名矣田畝
移換非舊額矣貧富升降非舊第矣戶部徒以空文摠
其故書蓋非得當時之實舊制人丁戍邊者蠲其租庸
六歲免歸玄宗方事夷狄戍者多死不返將怙寵而諱

以不死申故其貫籍之名不除至天寶中王鉞為戶口使方務聚斂以丁籍且存則丁身焉往是隱課而不出耳遂按舊籍計除六年之外積徵其家三十年租庸天下之人苦而無告則租庸之法弊矣迨至德之後天下兵起始以兵役因之飢瘠徵求運輸百役並作入戶凋耗版圖空虛軍國之用仰給于度支轉運二使四方征鎮又自給于節度團練使賦斂之司增數而莫相統攝綱目大壞朝廷不能覆諸使諸使不能覆諸州四方貢獻

悉入庫藏權臣猾吏緣以為姦或公訖進獻私為賊盜者動萬計有重兵處皆厚自奉養上賦所入無幾吏職之名隨人署置故科斂之名凡數百廢者不削重者不去新舊仍積不知其涯百姓受命而供之旬輸月送無有休息吏因其苛蠶食於人凡常人多丁率為官為僧以色役免貧人無所入則丁存故課免于上而賦增于下是以天下殘瘁蕩為流人鄉居地著百不四五如是迨三十年今請作兩稅法以一其名曰凡百役之費一錢之歛

度其數而賦於人量出以制入戶無主客以見居為簿人無丁中以貧富為差不居處而行商者在所郡縣稅三十之一度所與居者均使無僥幸居人之稅秋夏兩徵之俗有不便者正之其租庸雜徭悉省而丁額不廢申報出入如舊式其田畝之稅率以大歷十四年墾田之數為準而均徵之夏稅無過六月秋稅無過十一月逾歲之後有戶增而稅減輕及人散而失均者進退長吏而以度支總統焉德宗善而行之

三年五月初加稅時淮南節度使陳少遊請于當道兩
稅錢每一千加稅二百度支因詔諸道悉如之

貞元二年正月詔天下兩稅錢委本州揀擇官典上都
其應定色目程限腳價錢物委度支條流間奏

四年正月一日赦文其京兆府今年已後准當府每年
勅額應合給用錢物斛斗及草者宜便於兩稅內比諸
州府例尅留免其重疊請受餘送納度支其河南府亦
宜准此

八年四月劍南西川觀察使韋皋奏請加稅什二以增
給官吏從之

十二年十月虢州刺史崔衍奏所部多是山田且當郵
傳衝要屬歲不稔頗有流離舊額賦租特乞蠲減其略
曰伏見比來諸州應緣百姓間事患在典吏因循不為
申請不患陛下不優恤患在申請不指實不患朝廷不
施仁故有以不言受譴者未有以言得罪者陛下授臣
以疲人臣用不敢廻顧苟求自安敢罄狂聲上瀆聰聰

辭理切直為時所稱

元和四年二月度支奏諸州府應供上都兩稅匹段及
留使錢物等伏望起元和四年已後據州縣官正料錢
數內一半依京官例徵納見錢支給仍先以郭下兩稅
戶合納見錢充如不足即於當州兩稅錢內據貫均配
支給其餘留使留州雜給用錢即各委本州府並依送
省輕貨中估折納匹段充如本戶稅錢較少不成端疋
者任折納絲綿充數如舊例今徵納雜物斛斗支用者

即任准舊例處分應帶節度觀察使州府合送 上都兩
稅錢既須差綱發遣其留使錢又配管內諸州供送事
頗重疊其諸道留使錢各委節度觀察先以本州舊額留使
及送上都兩稅錢充如不足即于管內諸州兩稅錢內
據貫均配其諸州舊額供使錢即隨夏稅日限投送 上
都度支收入次年旨符便為定制伏以諸道兩稅徵斂
不常間井之間頗聞困弊臣今類會如前勅旨自今已
後送省及留使匹段不得剝徵折估錢其供軍醬菜等

價直合以留使錢充者亦令見錢匹段均納仍具每州
每使合納見錢數及州縣官俸料內一半見錢數同分
析間奏仍使編入今年旨條以為恒制餘依先是方鎮
皆以實估欵于人虛估聞于上宰相裴垍有司奏請
釐革人受其賜

六月令京兆府其兩稅宜以粟麥絲絹等折納

五年正月度支奏諸府州見錢准勅宜于營內州據都
徵錢數逐貫均配其先不徵見錢州郡不在分配限定

一州見錢數任刺史者百姓穩便處置其勅文不加減者即准州府所申為定額如于勅額見錢外輒擅配一錢及納物不依送省中估刺史縣令錄事參軍請與節級科貲

六年二月制編戶之征既有藝極字毗之要當恤有無苟徵歛之不時則困弊之無日近緣諸州送使錢物廻充上供合送使司又立程限所以每至歲首給用無資不免量抽夏稅新陳未接營辦尤難觀察使且以供軍

錢方圓借便輒不得量抽百姓夏貢有差先孚任王周
幣殊等實在使人近日所徵布帛並先定物樣一例作
中估受納精龐不等退換者多轉將貨賣皆致損折其
諸道留使留州錢數內絹帛等但得有用處隨其高下
約中估物價優饒與納則私無棄物官靡逋財其所納
見錢仍許五分之中量徵二分餘三分兼納實估匹段
先是天下百姓輸賦于府一曰上供二曰留州

建中初定稅時貨重錢輕是後貨輕錢重齊人所出固

以倍其初征矣其留州送使所在長吏又降省估使仍實估以自封殖而重賦于人及裴垍為相奏請天下留州送使物一切令于省估其所在觀察使仍以其蒞之郡租賦自給若不足復許徵于支郡其諸州送使額悉變為上供疲人稍蘇

十一年六月京兆府奏今年諸縣夏稅折納綾絹紈絰絲綿等並請依本縣時價祇定上中一等每疋加饒二百文綿每兩加饒二十支其下等物不在納限小戶本

錢不足任納絲綿斛斗湏是本戶如非本戶輒合集買成匹段代納者所由決十五枷項令衆勅旨依奏

十四年二月勅如聞諸道州府長吏等或有本任得替後遂于當處買百姓庄園舍宅或因替代情弊便破除正額兩稅不出差科今後有此色并勒依元額為定

唐會要卷八十三

欽定四庫全書

唐會要卷八十四

宋 王溥 撰

租稅下

元和十五年八月中書門下奏伏準今年閏正月十七日勅令百僚議錢貨輕重者全據郡官戶部尚書楊於陵等伏請權天下兩稅酒鹽利等悉以布帛絲任土所產物充稅並不徵見利則物漸重錢漸輕農人且免賦

賣疋帛者伏以郡官所議事皆至當深利公私請商量
付度支據諸州府應徵兩稅供上都及留州留使舊額
起元和十年以後並改配端疋斤兩之物為稅額如大
歷以前租庸課調不計錢今其折納使人知定制供辦
有常仍約元和十五年徵納布帛等估價其有舊納虛
與估依虛估廻計如舊納實估物並見錢即于端疋斤
兩上量加估價廻計變法在長其物價價長則永利公
私雖微有加稅法行即當就實比舊給用因利而不害

仍作條件處置編入旨符其益利酒利本以榷率計錢
有殊兩稅之名不可除去錢額但舊額中有令納錢者
亦請令折納時估定段官既不專以錢為稅人得以所
產用輸則錢貨必均其輕重農畝自廣于蠶織便時惠
下庶得其宜其土乏絲麻或地連邊塞風俗既異賦入
不同請商量委所司裁酌隨便宜處置勅旨宜依

太和二年二月興元尹王涯奏興元府南鄭兩稅錢額
素高每年徵科例多懸欠今請于管內四州均摊代納

二千五百貫文配蓬州七百五十貫巢州七百五十貫
通州五百貫巴州五百貫勅旨宣付所司

四年五月劍南西川宣撫使諫議大夫崔戎奏准詔
旨例置西川事條令與郭釗商量兩稅錢稅內三分二
分納見錢一分折納疋段每一貫加饒五百文計優饒百姓
一十三萬四千二百四十三貫文依此曉喻百姓訖經
賊州縣准詔三分減放一分計減放錢戶萬七千六百
二十貫文不經賊處先徵見錢令三分一分折納雜物

計優饒百姓一十三萬舊有稅薑莘之類每畝至七八百徵斂不時令併省稅名盡依諸處為兩限等第戶給戶帖餘一切名目勒停勅旨宜依

六年天平軍奏請起太和七年歲供兩稅榷酒等錢十

五萬貫粟五萬石

自元和末收復李師道十二州朝廷務安反側征賦所入盡留贍軍至是

方歸

王府

開成二年二月勅節度諸州府或遇水旱有欠稅額合供錢物斛斗可即委州縣長官設法招攜及召戶承佃

其錢陸續填納年終後具歸復墳補錢物數聞奏并報度支其刺史縣令得替須代替人交割仍須分見在主客戶交付後人不得遞相推注用破稅錢其所招之日不得將當處大戶擘為小戶別有配率

四年十月中書門下奏准開成元年三月十日勅宜令兩稅州府各于見任官中揀擇清強長定綱往來送五萬至十萬為一綱綱官考滿本州便與依資奏改通計十年往來優成與依資選遷當處令銓長焉如本州官

資望無相當者許優成奏他處官者伏以諸道有上供
兩稅錢物者大小計百餘處舊例差州縣官充綱亦不
聞過有敗闕若依勅以長定綱為名則命官不以才能
賦祿難憑倣運况江淮財賦大州每年差綱十餘輩若
令長定則官員長占于此流若祇取數人綱運當虧其
大半臣等商量長定綱起來年已後勒停臣又准開成
元年以前旨條州縣官充綱送輕貨四萬已上無欠少
不逾程限者書上考十萬減一選其於優獎猶似稍輕

送二萬至五萬依舊書上考五萬至七萬與減一選七
萬至十萬減二選十萬至十五萬減三選如一度充綱
優勞未足考秩之內情願再差者旨條先有約約絕此
後望今開許如年少及材質不當但令准舊例以課料
資陪不必一例依次差遣其餘並望准前旨條處分勑
旨宜依其年十二月邕管經畧使唐弘實當管上供兩
稅錢一千四百七十三貫文其見錢請每年附廣州綱送
納勑邕管兩稅錢八百餘千自今輸納頗甚艱弊宜委

嶺南西道觀察使每年與受領迴易輕貨附綱送省其
就運腳錢仍令於放送內抽折

會昌元年正月制租斂有常王制斯其徵率無藝齊民
何依内外諸州府百姓所種田苗率稅斛斗素有定額
如聞近年長吏不守法制分外徵求致使力農之人轉
加困弊亦有每年差官巡檢勞擾頗深自今已後州縣
每年所徵科斛斗一切依額為定不得隨年檢責數外
如有荒閒陂澤山原百姓有人力能墾闢耕種州縣不

得輒問所收苗子五年不在稅限五年之外依例收稅
於一鄉之中先填貧戶欠闕如無欠闕即均減衆戶合
徵斛斗但令不失元額不得隨田加率仍委本道觀察
使每年秋成之時具管內墾田頃畝及合徵上供留州
使斛斗數分折聞奏如所奏數外有剩納人戶斛斗
刺史以下并節級重加懲賊觀察使奏聽進止仍令出
使郎官御史及度支鹽鐵知院訪察聞奏

大中二年正月制諸州府縣等納稅祇合先差優長戶

車牛近者多是權要及富豪之家悉請畱縣輸納致使
單貧之人却湏僱脚駄載從今已後其畱縣並湏先饒
貧下不支濟戶如有違越節級官吏量加科殿

四年正月制其令天下諸州府百姓兩稅之外輒不許
分外更有差率已頗申飭尚恐因循宜委御史臺切加
紀察其諸道州府應所徵兩稅匹段等物並留州使錢
物納匹段虛實估價及見錢從前皆有定制如聞近日
或有於虛估匹段數內徵實估物及其間分數亦不盡

勅條宜委長吏切加遵守如有違越必議科繩本判官專知官當重懲責又青苗兩稅本繫田土地既屬人稅合隨去後前教令累有申明豪富之家尚不恭守皆是承其急切私勒契書自今已後勒州縣切加覺察如有此色湏議痛懲其地仍便勒還本主更不在論理價直之限

六年三月勅先賜鄭光鄆縣及雲陽縣庄一所府縣所有兩稅及差科色役並特宜放者中書門下奏伏以

鄭光是陛下元舅寵待固合異等然而據地出稅天下皆同隨戶雜徭久已成例將務致理實為本根近日陛下屢發德音欲使中外盡一凡在士庶無不仰戴聖慈今獨忽免鄭光莊田則似稍乖前意況征賦所入經費有常差使不均怨嗟斯起事雖至微繫體則多臣等備位台司每承誠勵苟有管見合具啟陳謹錄奏聞伏聽勅旨奉批答省所奏具悉朕以鄭光元舅之尊貴欲優異令免征稅初不細思卿等列位股肱每存匡益事

無大小必竭公忠况親戚之間人所難議苟非愛我豈進嘉言庶事能盡如斯天下何憂不理有始有卒當共守之省覽再三良增慰悅所奏依

雜稅

建中元年九月戶部侍郎趙贊請置常平輕重本錢從之贊於是條奏諸道津要都會之所皆置吏閱商人財貨計錢每千稅二十文天下所出竹木茶漆器什一稅之充常平本錢時軍用稍廣常賦不定所稅亦隨盡竟

莫得充本儲積焉

四年六月判度支戶部侍郎趙贊請置大田天下田計其頃畝官收十分之一擇其上腴樹桑環之曰公桑自王公至於匹庶差借其力得穀絲以給國用詔從其說贊熟計之自以為非便皆寢不下請復常平稅茶之法又以軍須迫蹙常平利不時集乃請稅屋間架除筭陌錢間架法凡屋兩間為一間屋有貴賤約價三等上價出錢二千中價一千下價五百所由吏秉筆執籌

入人之廬舍而計其數衣冠士族或貧無他財獨守故業坐多屋出筭者動數十萬人不勝其苦凡沒一間杖六十告者賞錢五十貫取於犯家除陌法天下公私給與貿易率一貫舊筭二十益加筭為五十給與他物或兩換者約錢為筭率之市牙各給印紙人有買賣隨日署記翌日合筭之有自貿易不用市牙者給其私簿無簿者投狀自集其有隱錢百者沒入三千杖六十告者賞十千出於犯罪人家法既行而主人市牙得專其柄

率多隱盜公家所入曾不得半而怨讐之苦囂然滿於
天下至興元元年正月一日赦悉停罷貞元九年正月
初稅茶先是諸道鹽鐵使張滂奏曰伏以去歲水災詔
令減稅今之國用湏供儲仗請於出茶州縣及茶山外
商人要路委所由定三等時估每十稅一充所放兩稅
其明年已後所得稅錢外貯若諸州遭水旱賦稅不辦
以此代之詔曰可仍委張滂區處條目每歲得四十萬
貫茶之有稅自此始也然稅無虛歲遭水旱處亦未嘗

金史卷一百一十一
卷八十四
以稅茶錢拯贍

元和三年十月禁採銀一兩已上者笞二十遞出界州
縣官更節給科罪

長慶元年鹽鐵使王播奏茶稅一百增之五十左拾遺
李珏上疏論之曰設法救饑起自干戈天下無虞即宜
蠲省况稅茶之事尤出近年在貞元中不得不爾今四
海鏡淨八方砥平厚斂於人殊傷國體其不可一也又
茶為食物無異米鹽人之所資遠近同俗既祛渴乏難

捨斯須田閭之間嗜好尤切今增稅既重時估必增流
弊於人先及貧弱其不可二也且山澤之饒固無定數
量斤論稅所冀售多價高則市者希價賤則市者廣歲
終上計其利幾何未見阜財徒云歛怨其不可三也臣
不可遠徵故事直以目前所見陳之伏望暫留聰明少
垂念慮時追勅更賜商量陛下即位之初已徵歛外官
押貫旋即勅停洋洋德音千古不朽今若榷茶加稅頗失
人情臣忝諫事不敢緘默時禁中造百尺樓國計不充
王構希恩增稅疏奏不省

太和七年四月御史臺奏伏准太和三年十月十八日
赦文天下除兩稅外不得妄有科配其擅加雜權率一
切宜停令御史臺嚴加察訪者臣伏以方今天下無事
聖政日修務去煩苛與人蘇息臣昨因嶺南道擅置竹
練場稅法至重害人頗深博訪諸道乃知自太和三年
准赦文兩稅外停廢等事旬月之外內或以督察不嚴
或以長吏更改依前却置重困齊民伏望起今後應諸
道自太和三年准勅文所停稅外科配雜權率等復有

卻置者仰勅到十日內具卻置事由聞奏仍申報臺司
每有出使郎官御史令嚴加察訪苟有此色本判官重
加懲責長史奏聽進止勅旨宜依

開成二年十二月武寧軍節度使薛元賞奏泗口稅場
應是經過衣冠商客金銀羊馬斛斗見錢茶鹽綾絹等
一物已上並稅今商量其雜稅並請停絕勅旨准泗通津向
來京國自有雜稅頗聞怨讐薛元賞到鎮之初首請除
去表章適至深愜朕懷泗口稅據元賞所奏並停所置

當官司所由並罷委元賞當日榜示其泗口稅額淮徐
泗觀察使今年前後兩度奏狀內監收共得錢一萬八
千五十五貫文內十驛一萬一千三百貫文委戶部每
年以寶錢逐近支付泗口其他未贍委在才臣息怨咨
以奉施行

大中六年正月鹽鐵轉運使兵部侍郎裴休奏諸道節度
觀察使置店停止茶商每斤收搘地錢并稅經過商人頗
乖法理今請釐革橫稅以通舟船商旅既安課利自厚又

正稅茶商多被私販茶人侵奪厚利今請強幹官吏先
於出茶山口及廬壽淮南界內布置把曉諭招收量加
捉半稅給陳首帖子令其所在公行從此通流更無苛
奪所冀招懷窮困下絕奸欺使私販者免犯法之憂正
稅者無失利之歎尋究根本須舉綱條勅旨宜依其年
四月淮南及天平軍節度使浙西觀察使皆奏軍用困
竭伏乞且賜依舊稅茶勅旨裴休條流茶法事極精詳
制置之初理須畫一並宜準今年正月二十六日勅處分

租庸使

開元十一年十一月宇文融除殿中侍御史勾當租庸
地稅使天寶三年四月陝郡太守韋堅加兼知勾當租
庸使六年十一月楊國忠兼知諸郡租庸使至德元年
十月第五琦除監察御史充江淮租庸使中書侍郎房
琯諫曰往者楊國忠厚斂取怨天下陛下即位以來人
未見德琦聚斂臣也今復寵之是國家斬一國忠而用
一國忠矣將何以示遠方歸人心乎上曰天下方急六

軍之命若倒懸無經費則人散矣卿惡琦可也何所取財玷不能對自此恩減於舊矣

廣德元年十月代宗居陝考功郎中裴諤遷考功及南曹二任赴行在上將以為御史中丞為元載所排出為河東道租庸鹽鐵等使時關輔大旱諤請入計召見便殿問諤權酷之利一歲出入幾何久之不對上復問之對曰臣有所思上曰何思對曰臣自河東來其間所歷三百里見農人愁懷穀菽未種臣謂陛下軫念先問人

之疾苦而乃責臣以利益子曰理國者仁義而何以利
為是以未敢即對上前坐曰微公言吾不聞此拜左司
郎中

永貞元年三月京兆尹第五琦奏租庸使請一切並停
唯差判官一人巡官二人催遣從之

兩稅使

建中三年八月初分置汴東西水陸運兩稅鹽鐵使

至十

二月二十日包佶

崔縱分為之焉

貞元七年六月太常卿崔縱為汴西水陸運兩稅監鐵等使田悅軍敗魏州嬰城自守河東朔方昭義河陽及神策兵圍之軍乏食乃以縱兼魏城四節度都糧料使軍食稍給涇原兵及上居奉天四方握兵未有至者時縱先知乃潛告朔方節度使李懷光說令奔命懷光從之縱乃悉斂軍財與懷光俱來調給甚備懷光軍士久戰河外及次河中遷延未進縱以貨幣先渡河謂懷光軍士曰若濟河悉所齎以分將士衆利之乃肯西濟

八年四月以東都河南江淮嶺南山南東道兩稅等錢物令戶部侍郎轉運使張滂主之東渭橋以東道兩稅諸道巡院悉隸滂以關輔河東劍南山南西道財物令戶部尚書奏之使班宏主之其後宏滂互有短長宰相趙憬陸贊具以其事上聞由是參用大厯故事如劉晏韓滉所為焉

元和四年六月勅兩稅法總諸稅物極是使人但緣約法之初不定物估粟帛轉賤賦稅自加人力不堪國所切

湏務宜通濟令其便安欲遣使臣巡行國邑郵驛所届豈
免煩勞輶車遽馳曾未周悉度支鹽鐵泉貨是司各有
分廵置於都會爰命帖職周視四方簡而易從庶協權
便政有所弊事有所宜皆得舉聞副我憂寄其鹽鐵使
揚州留後宜兼充淮南浙西浙東宣歙福建等道兩稅
使其江陵留後宜兼充荆南山南東道鄂岳江西湖南
嶺南等兩稅使其江陵留後宜兼充荆南山道兩稅使
度支山南西道分巡院官宜兼充劍南東西州山南四

道兩稅使其陝內五監舊屬鹽鐵使宜割屬度支使便委山南西道兩稅使兼知糴貨各奉所職期於盡心五年誅李師道收復淄青十二州未定戶籍乃命諫議大夫王彥威充十二州勘定兩稅使朝法振舉人不以為煩

七年七月荆南兩稅使崔陵賜紫金魚袋浙江東道兩稅使程异賜朝散大夫以入計叙勞也

十五年閏正月命度支郎中趙佶使淄青充海鄆曹濮

蔡申光等州勘兩稅

戶口數

永徽三年七月戶部尚書高履行奏計戶三百八十萬
神龍元年十一月二十五日戶部尚書蘇瓌奏計戶六
百一十五萬六千一百四十一

開元十四年戶部進計帳今年管戶七百六萬九千五
百六十五

二十年戶部計戶七百八十六萬二千二百四十六

二十六年計戶八百一萬八千七百一十

天寶元年計戶八百五十二萬五千七百六十三

十三年計戶九百六萬九千一百五十四

至德元年計戶八百一萬八千七百一

乾元三年計戶一百九十三萬一千一百二十五

建中元年十二月定天下兩稅戶凡三百八十萬五千

七十六

元和戶二百四十七萬三千九百七十三

長慶戶三百九十四萬四千九百八十二

太和戶四百三十五萬七千五百七十五

開成四年計戶都管四百九十九萬六千七百五十二

會昌戶四百九十五萬五千一百五十一

雜錄

貞觀二十年太宗問民部侍郎盧承慶歷代戶口多多少之數承慶叙夏殷之後迄於周隋皆有依據太宗嗟賞之

永徽三年七月二十二日上問戶部尚書高履行去年進戶多少履行奏言去年進戶總十五萬已上天下進戶漸多謂長孫無忌曰比來天下無事戶口稍多二三十年足堪殷實因問隋有幾戶今見在幾戶履行奏隋開皇中有八百七十萬即今見戶三百八十萬上曰自隋末亂離戶口減耗邇來雖復蘇息猶大少於隋初開元二十四年三月勅朕以百姓為心固非一人獨理委之牧宰輯寧兆庶若考論政績在戶口存亡不有甄

明何憑賞罰自今以後天下諸州戶口或刺史縣令有
離任者並宜分明交付州縣仍每至年終各具存乏及
增加實數同申並委採訪使重覆報省所司明為課
最具條件奏聞隨事褒貶以旌善惡

貞元三年五月詔曰諸州戶口減耗三分去二其官員
亦合減省

元和二年十二月史官李吉甫等撰元和國計簿十卷
總計天下方鎮凡四十八道管州府二百九十三縣一

千四百五十三見定戶二百四十四萬二百五十四鳳

其

朔鄜坊邠寧振武涇原涼夏靈鹽河東易定魏博鎮冀
范陽滄景淮西淄青十五道七十一州並不申戶口數

每歲縣賦入倚辦止於浙西浙東宣歙淮南江西鄂岳

福建湖南等道合四十州一百四十四萬戶比量天

寶供稅之戶四分有一天下兵戎仰給縣官八十三萬

餘人比量士馬三分加一率以兩戶資一兵其他水旱

所損徵科妄歛又在常役之外

六年二月制自定兩稅以來刺史以戶口增減為其殿

最故有析戶以張虛數或分產以繫戶兼招引浮客用為增益至於稅額一無所加徒使人心易搖土著者寡觀察使嚴加訪察必令詣實

會昌三年八月制朕聞三代已前未嘗言佛漢魏之後像教寢興是遭逢季時傳此異俗且一夫不耕有受其餧者一婦不織有受其寒者今天下僧尼不可勝數皆待農而食待蠶而衣貞觀開元亦常釐革剗除不盡流衍滋多中外諸臣協予正意濟人利衆予不讓焉天下

所還俗僧尼二十六萬五千餘人奴婢為兩稅戶十五萬人

移戶

貞觀元年朝廷議戶殷之處聽徙寬鄉陝州刺史崔善為上表曰畿內之地是謂戶殷丁壯之人悉入軍府若聽移轉使出關外此則虛近實遠非經適之義其事遽止

天授二年七月二十四日徙關外雍同泰等七州戶數

十萬以實洛陽

開元十六年十月勅諸州客戶有情愿屬緣邊州府者至彼給良沃田安置仍給永年優復宜令所司即與所管客戶州計會召取情願者隨其所樂具數奏聞

寶歷元年五月勅黠首如有願于所在編附籍帳者宜令州縣優恤給與閒地二周年不得差遣

唐會要卷八十四